



PANNAKIUUMAN MAIPAPAN KADAGITI KASAPULANDA

Diyo nasken nga aramiden daytoy nga agmaymaysa. Ti pannakiuman ket maikaipaay iti tulong a kasapulanyo a mangtulong iti dadduma.

Inawisnakayo ti Dios nga agminister iti maysa nga indibidwal wenno pamilya iti ward wenno branchyo a mayanurot kadagiti kasapulanda. Kasano a maammuanyo no ania dagita a kasapulan? Ti pagbatayan ti pannakiuman, a nagbalinen a pokus iti Simbaan, isu ti tulbek.

Kalpasan ti panangilawlawag no ania ti mabalin nga ibilang iti pannakiuman, suksisokentayonto:

1. Pannakiuman iti Nailangitan nga Ama.
2. Pannakiuman iti naidutok nga indibidwal ken pamilya.
3. Pannakiuman iti kompaniontayo.
4. Ken pannakiuman kadagiti dadduma a naidutok iti isu met laeng nga indibidwal wenno pamilya.

Napateg pay ti pannakiuman kadagiti lidertayo. Ti masakbayan a Dagiti Pagbatayan iti Ministering Principles iti *Liahona* ket magsukisokto iti pannakiuman kadagiti lidertayo kasta met ti akem dagiti interbyu iti ministering iti dayta a proseso.

Ania ti Maipapan iti Panaggiinnumantayo

Napateg iti ministering iti tunggal maysa ti pannakawwat kadagiti kasapulan. Ngem ania dagiti kita a mabalin a gun-oden dagita a kasapulan, ken adda kadi maysa a banag nga ad-adda pay ngem dagiti kasapulan a nasken nga ammuentayo?

Mabalin a dumteng dagiti kasapulan iti adu a porma. Mabalin a maipasango dagiti pagserbiantayo iti pannubok

a mainaig iti rikna, kuarta, bagi, edukasion, ken adu pay. Nangatngato a prioridad ti sumagmamano a kasapulan ngem iti dadduma. Sumagmamano a kasapulan nga adda-antayo tapno pangtulong; mabalin a mangidawat kadatayo ti dadduma pay a kasapulan a mangiraman iti tulong ti sabali pay a tao kadatayo. Kadagiti panagkagumaantayo a makatulong a mangipaay kadagiti temporal a kasapulan, saantayo a liplipatan a ti awagtayo nga agminister ket mangiraman iti panangtulong kadagiti dadduma nga agaramid kenn agtungpal kadagiti katulagan, nga agsag-sagana ken umaw-awat kadagiti ordinansa ti priesthood a kasapulan unay iti pannakaitan-ok.

Kas nasyon iti pannakiuman maipapan kadagiti kasapulan ti indibidual ken familia, nasken nga adalentayo dagiti pagpigsanda. Ania dagiti saanda a kasapulan a tulong? Ania dagiti kabaen ken talento nga adda kadakuada a mabalin a mangparabur kadagiti dadduma? Kasano a naidumduma a mayannatup dagitoy tapno makatulong a mangbangon iti pagarian ti Dios? Dagiti pagpigsan ti maysa nga indibidual ket kas kapatag iti pannakaawat kadagiti kasapulanna.

Pannakiuman iti Nailangitan nga Ama

Maysa kadagiti kangrunaan a pagbatayan ti pammatitayo ket ti pannakisao ti Nailangitan nga Ama kadagiti annakna (kitaen iti Pagannurotan ti Pammati 1:9). No umawattayo iti baro a naidutok nga aramiden nga agserbi wenno agminister iti maysa a tao, nasken a makiumantayo iti Nailangitan nga Ama iti kararag, nga agkalkalikagum a manggun-od kadagiti nauneg a pannakaammo [insights] ken pannakaawat maipapan kadagiti kasapulan ken pagpigsanda. Ti proseso ti pannakiuman babaen ti kararag ket agtultuloy koma iti naidutok nga aramidentayo iti ministering.

Pannakiuman kadagiti Indibidual ken Familia

No kasano ken no kaano nga asitgantayo dagiti indibidual ken familia a nakaawagantayo a pagserbian ket mabalin nga agduma depende kadagiti kasasaad, ngem ti direkta a pannakiuman iti indibidual wenno familia ket kasapulan unay para iti panangparnuay kadagiti panaglalangen ken pannakaawat kadagiti kasapulanda, agraman no kasano ti kayatda a pakatulongan. Nalabit nga itantanmo pay ti panagdamag kadagiti sumagmamano a saludsod agingga a saan a mapadur-as dagiti napapateg a pannakilangen. Idinto nga awan ti maysa a wagas a mangaramid iti dayta, ibilangyo dagiti sumaganad:

- Ammuen no kasano ken kaano ti kaykayatda a panangkontak kadakuada.
- Adalen ti maipapan kadagiti paggugusto ken nagtaudanda.

- Inkayo nga addaan kadagiti singasing iti no kasano a makatulongkayo, ket agkiddaw kadagiti singasingda.

No nabangontayo ti panagtalek, ibilang ti panangilawlawag kadagiti kasapulan ti indibidual ken familia. Agdamag kadagiti saludsod no tignayennakayo ti Espiritu Santo.¹ Kas pagarigan:

- Ania dagiti karit a pakaipasanguanda?
- Ania dagiti panggep a tun-oyen [goal] ti familiada wenno ti indibidual? Kas pagarigan, kayatda kadi ti agbalin a nasaysayaat iti panangangay iti family home evening, wenno agbalin nga ad-adda nga agpannuray iti bagi [self-reliant]?
- Kasano a makatulongtayo kadakuada kadagiti panggep a tun-oen [goal] ken karitda?
- Ania dagiti ordinansa iti ebanghelio a sumangbay iti biagda? Kasano a makatulongtayo kadakuada nga agsagana?

Laglagipenyo ti mangidiaya iti masinunuo a tulong, kas iti, Ania a sardam a mabalin nga itugotandaka iti pangmalen a taraon iti daytoy a lawas? Ti pangidiaya a kas iti, “Ammuenmi no adda maaramidmi,” ket saan unay a makatulong.

Pannakiuman iti Kompaniontayo

Gapu ta mabalin a saankayo nga agkadua a kanayon no makapulapolyo ti indibidual wenno familia, napateg nga agtinnulong ken aginnumankayo no agkiddawkayo iti inspirasion kas agkompanion. Dagitoy ti sumagmamano a saludsod nga ibilang:

- Kasano ken kasano ti kasansan nga agsaritakayto kas agkompanion?
- Kasano a mausar ti tunggal maysa kadakayo dagiti pagpigsanyo nga agminister kadagiti kasapulan ti familia wenno indibidual?
- Ania dagiti banag a nasursurom, ania dagiti padas a napasaram, ken ania dagiti parikna [promptings] a naawatmo manipud iti naudi nga insaritam maipapan iti indibidual wenno familia?

Pannakiuman kadagiti Dadduma a Nadutokan iti Aramid

Mabalin a nasayaat a masansan a makasarita dagiti dadduma a nadutokan nga agminister iti isu met laeng nga indibidual wenno familia a naidutok kadakayo.

Makisarita tapno Mangrisut kadagiti Karit

Inaramat ni Elder Chi Hong (Sam) Wong ti Pitupulo ti maysa a pakasaritaan manipud iti Marcos 2 iti panawentayo a mangipakita no kasano a ti panaggiinnuman a sangkamaysa ket mangaramid a posible a mapattapata

ti uppat a tao no kasano a makapan ti maysa a lalaki a di makagunay iti imatang ni Jesus.

“Mabalin a mapasamak a kas iti daytoy,” kinuna ni Elder Wong. “Uppat a tao ti mangipatpatungpal iti naidutok nga aramiden manipud iti bishopda tapno sumarungkar, iti pagtaenganna, lalaki nga addaan iti sakit a saan a makagunay. . . . Iti kallabes unay a ward council, kalpasan ti panaggiinnuman a sangkamaysa maipapan kadagiti kasapulan iti ward, nangted ti bishop kadagiti naidutok nga aramiden a ‘panangispal.’ Nadutokan dagitoy nga uppat a tumulong iti daytoy a lalaki. . . .”

“[Idi nakadanonda iti pasdek a yan ni Jesus,] napno ti siled iti adu a tattao. Saanda a makastrek iti ridaw. Siguradoak a pinadasda ti amin a banag a mapanunotda, ngem saanda latta a nakastrek. . . . Naggiinnumanda a sangkamaysa maipapan iti sumaruno nga aramidenda—no kasano a mayegda ti lalaki ken ni Jesucristo tapno maagasan. . . . Napagnunumuanda ti maysa a plano—saan a nalaka, ngem inaramidda daytoy.

“ . . . ‘Inikkatda ti atep a batog ti masakit a lalaki: ket idi maikkatda daytoy, imbabada ti katre iti yan ti nakaid-da a masakit a tao a di makagunay’ (Marcos 2:4). . . .”

“ . . . ‘Idi makita ni Jesus ti pammatida, kinunana iti masakit a di makagunay, Anak, napakawankan kadagiti basbasolmo’ (Marcos 2:5).”²

Awis nga Agtignay

Inggutugot ni Elder Dieter F. Uchtdorf ti Korum dagiti Sangapulo-ket-dua nga Apostol, “Aggiinnumankayo, usarenyo ti amin a resources a sidadaan a mangun-od, ikarigatanyo a gun-oden ti inspirasion ti Espiritu Santo, agdawatkayo iti Apo iti pammatalged, ket kalpasanna ileslesyo ti manggas ti badoyo ket agbannogkayo.

“Ikarik kadakayo: ia no surottenyo daytoy a pagtulan, umawatkayonto iti masinunuo a pannarabay no maipanggep iti *no asino, no ania, no kaano*, ken *no sadino* ti pangipaayan iti tulong iti wagas ti Apo.”³

Naisangrat dagiti artikulo iti “Pagbatayan iti Ministering” a mangtulong kadatayo a mangsursuro a mangaywan iti tunggal maysa—saan a maibinglay kas mensahe kabayatan dagiti isasarungkar iti ministering. Bayat ti pannakaam-ammotayo kadagiti tao a pagserbiantayo, iparik-nanto kadatayo ti Espiritu Santo tapno ammotayo no ania a mensahe ti mabalin a kasapulada kas nayon iti panangaywan ken panangngaasitayo.

TI BILEG TI PANNAKIUMAN

“No, kayatyo a pasayaaten ti maysa a banag, nas-ken a makiumankayo maipapan iti daytoy,” kinuna ni Presidente M. Russell Ballard, Agak-akem a Presidente ti Korum dagiti Sangapulo-ket-dua nga Apostol. “No [aramiden]tayo, mapartuattayo ti naespirituan a sinerhismo nga isu ti napadakkel a kinaepektibo wenno pannakagun-od kas resulta ti napagtipon a tignay wenno pannakitunos, a ti resultana ket dakdakkel ngem iti kadagupan dagiti saggaysa a paset” (iti R. Scott Lloyd, “Counseling with Councils Is Lord’s System, Elder Ballard Declares,” Ene. 11, 2017, news.lds.org; “Strength in Counsel,” *Ensign*, Nob. 1993, 77).

Ti panangparnuay kadagiti pannakilangen ket napateg pay a paset ti panaggiinnuman a sangkamaysa. Kitaen met iti artikulo iti Dagiti Pagbatayan iti Ministering “Panangbuangay kadagiti Nasinged a Relasion,” Agosto 2018 nga isyu ti *Liahona*, iti panid 6.

DAGITI NAGADAWAN

1. Kitaen iti *Preach My Gospel: A Guide to Missionary Service* (2004), 183.
2. Chi Hong (Sam) Wong, “Rescue in Unity,” *Liahona*, Nob. 2014, 14–15.
3. Dieter F. Uchtdorf, “Providing in the Lord’s Way,” *Liahona*, Nob. 2011, 55.